

欽定大清會典事例

欽定大清會典事例卷六百三

兵部

議敘通例 軍功優敘三

道光二年

諭長齡奏勦捕番賊已就肅清一摺。青海口外野番抗  
不回巢。經該督等率領官兵入山拏捕。儘數殲除。迅  
速歲功。覽奏欣慰。長齡著加恩賞戴雙眼花翎。交部  
從優議敘。○八年。擒獲逆裔張格爾。

諭長齡等奏生擒首逆馳報紅旗一摺。覽此捷奏。實深  
嘉悅。長齡著加恩錫封威勇公爵。世襲罔替。並賞戴

寶石帽頂。兩團龍補服。授為御前大臣。賞用紫韁。楊芳著加恩。錫封果勇侯爵。世襲罔替。並賞用紫韁。換戴雙眼花翎。在御前侍衛上行走。貝子伊薩克帶領回衆。隨同楊芳等出卡擒賊。忠勤可嘉。著加恩晉封郡王。○又

諭。逆裔張格爾。自嘉慶二十五年以後。屢次入卡。擾我邊陲。道光六年。復勾結布魯特。安集延等回衆。搶占四城。朕命將出師。天戈所指。迅就克復。嗣因該逆乘間逃逸。留兵防緝。乃故智復萌。敢以釜底游魂。復於上年除夕。潛入卡倫。希圖窺伺。經長齡督同楊芳統

率將領官兵立擒巨憝。檻送闕廷。朕於本日御午門受俘禮成。感慰之餘。益深祇懼。因念該將軍等克奏膚公。前已懋賞酬庸。茲當大禮慶成。尤宜渥加恩賚。揚威將軍大學士公長齡。著加恩晉加太保銜。賞戴三眼花翎。參贊大臣侯揚芳。著加恩賞加太子太保銜。哈琅阿誠。端吉勒通阿祥雲。保解俘來京。一路管束妥協。著交部照軍功例從優議敘。其自軍營派出長解到京官兵。亦俱著照軍功例從優議敘。○又諭。自道光六年喀什噶爾用兵以來。軍機大臣曹振鏞等。佐朕運籌軍務。夙夜勤勞。承書諭旨。鉅細無遺。茲

元兇生擒。紅旗報捷。軍機大臣等尤當再沛恩施。用  
昭獎勸。大學士曹振鏞著晉加太傅銜。賞用紫韁。吏  
部尚書文孚著晉加太子太傅銜。賞用紫韁。戶部尚  
書王鼎著賞戴花翎。兵部尚書五麟著晉加太子太  
保銜。工部尚書穆彰阿著晉加太子少保銜。即在軍  
機大臣上行走。仍俱著照軍功。交部議敘。○十二年。  
以殲斃湖南省江華縣逆。搖趙金隴。賞總督盧  
坤提督羅思舉雙眼花翎。並一等輕車都尉世  
職。提督余步雲。太子少保銜。仍予優敘。○咸豐

五年

諭僧格林沁西凌阿奏克復連鎮。生擒逆首。全股賊匪。掃數殲除。一摺。覽奏欣慰。科爾沁郡王僧格林沁。經朕授為參贊大臣。督兵勦賊。疊著勳勞。此次攻克連鎮。生擒逆首。逆調度有方。深堪嘉尚。著加恩封為博多勒噶台親王。伊子乾清門二等侍衛伯彥諾謨。著在御前行走。察哈爾都統西凌阿。襄贊軍務。克奏厥功。著賞給尹精阿巴圖魯名號。並輕車都尉世職。○

又

諭僧格林沁德勒克色楞西凌阿奏馮官屯軍務告竣。首逆就擒。餘匪盡殲。一摺。覽奏欣慰。科爾沁博多勒

噶台親王僧格林沁。自授為參贊大臣後。督師勦賊。均合機宜。忠勇之誠。深堪嘉尚。前次勦滅連鎮賊匪。即迅速移兵圍勦高唐。迨逆匪竄踞馮官屯。堅匿不出。復多方設法。將逆黨首要各犯。悉數殲擒。北路一律肅清。厥功甚偉。前經賞給親王。著加恩世襲罔替。並賞坐肩輿。伊兄二品頂戴台吉琅布林沁。著賞給輔國公。伊弟四等台吉崇格林沁。著賞給二品頂戴。並賞戴花翎。貝子德勒克色楞。前在勝保軍營。未能迅速奏功。本有應得之咎。自隨同僧格林沁幫辦軍務後。極知奮勉。克成厥功。著賞給貝勒銜。並賞戴三

眼花翎。察哈爾都統世襲輕車都尉西凌阿。幫辦軍務。疊著戰功。著賞給三等男爵。所有在事出力文武各員。並著僧格林沁等查明保奏。候朕施恩。○六年

諭。胡林翼奏官軍克復武昌省城一摺。胡林翼著補授湖北巡撫。並賞給頭品頂戴。總兵楊載福。著賞加提督銜。布政使銜記名道安慶府知府李續賓。著記名以按察使使用。○十年

諭。和春何桂清等奏江南援兵會同杭州駐防官兵克復杭州省城一摺。覽奏實深欣慰。杭州將軍瑞昌於省城被陷後。尚能堅守駐防城至六日之久。以待援



兵會同克復。厥功甚偉。著賞穿黃馬褂。並賞給二等  
輕車都尉世職。候補提督張玉良。出奇制勝。於兩日  
內克復杭城。實屬謀勇超羣。著賞穿黃馬褂。並賞給  
騎都尉世職。署浙江巡撫王有齡。密告機宜。籌濟軍  
火糧餉。不遺餘力。著補授浙江巡撫。欽差大臣江甯  
將軍和春。兩江總督何桂清。派兵援救。不分畛域。均  
著先行交部從優議敘。○又以江西省樂平浮梁鄱  
陽景德等處肅清。予候補三品京堂左宗棠優  
獎。賞道員王開化布政使銜。並二品封典。知縣  
劉典直隸州知州戴花翎。○又

諭。安慶省城被陷九載。楚軍由九江進攻。水陸合圍。逆首陳玉城。疊次糾黨來援。均經官軍協力擊退。城破之日。被殲及溺斃賊匪至一萬六千餘名。欽差大臣大學士湖廣總督官文。欽差大臣兩江總督曾國藩。調度有方。均堪嘉尚。官文著加恩賞加太子太保銜。曾國藩著加恩賞加太子少保銜。湖北巡撫胡林翼。首先畫策。身親督勦。厥功甚偉。著加恩賞加太子太保銜。並賞給騎都尉世職。安徽巡撫李續宜。前經隨同籌辦。著加恩賞穿黃馬褂。福建水師提督楊載福。福州副都統多隆阿。疊著戰功。均著加恩賞給雲騎

尉世職道員曾國荃著賞加布政使銜以按察使記名遇缺題奏並加恩賞穿黃馬褂以示優獎。○同治

元年

諭勝保奏官軍乘勝攻勦潁郡東西南三面偏城逆匪續獲全勝立解城圍一摺辦理甚為妥速欽差大臣兵部左侍郎勝保自直東遠道赴援沿途獲捷深入疾進兩日之間擊散賊衆數萬立解重圍加恩著賞給兵部尚書銜三品頂戴安徽布政使署安徽巡撫賈臻賞給二品頂戴並交部從優議敘。○又

諭袁甲三奏皖軍會合楚師攻克廬郡並勝保奏生擒

首逆陳玉城一摺。除苗沛霖另行降旨。准予免罪外。已革副將苗金開。著開復原官勇號。並著交軍機處記名。遇有總兵缺出。請旨簡放。署遊擊朱佩榮。著以遊擊儘先即補。署總兵博崇武。著賞加提督銜。遊擊王金奎。著賞給克勇巴圖魯名號。以示獎勵。○又以克復安徽省太平蕪湖兩城。並金柱關東梁山各要隘。予福建提督王明山優敘。賞記名提督李成謀。黃馬褂。總兵李朝斌。黃翼升。成發。翔。記名提督。○又

諭。曾國藩奏官軍克復甯國府城一摺。浙江提督鮑超

親督諸軍。冒暑苦戰。屢復名城。茲復攻克甯國。洵屬  
戰功卓著。忠勇堪嘉。加恩著賞給雲騎尉世職。以示  
優獎。○又

諭。曾國藩奏金陵各營屢獲大捷。力解重圍一摺。江蘇  
布政使曾國荃著賞給江紬黃馬褂料一件。小卷江  
紬袍料一件。白玉喜字翎管一枝。白玉柄小刀一把。  
曾貞幹著加恩以知府用。即補道劉連捷。所請以按  
察使記名簡放。前廣東南韶道吳坤修。所請仍以道  
員記名簡放。均與吏部新定章程不符。惟此次金陵  
督兵苦戰。並有殲斃賊中頭目。戰功卓著。與尋常勞

績不同。劉連捷著准其以按察使記名簡放。並賞加布政使銜。吳坤修著准其仍以道員記名簡放。○二年

諭。駱秉章奏生擒逆首石達開等。並勦滅髮逆巨股一摺。太子少保四川總督駱秉章。運籌決策。調度有方。著賞加太子太保銜。尤為出力之總兵唐友耕。著記名。遇有提督缺出。請旨簡放。○又

諭。僧格林沁等奏督軍進援蒙城。斬馘首逆苗沛霖。生擒悍黨。蹋平賊壘。立解城圍一摺。僧格林沁。甫抵蒙城。元兇授首。具見調度有方。著交部從優議敘。富明

阿國瑞著一併交部從優議敘。記名總兵陳國瑞著  
俟補總兵後以提督記名簡放。總兵詹啟綸著遇有  
提督缺出儘先提奏。總兵王萬清著賞給勳勇巴圖  
魯名號。蒙城官紳李南華等固守待援時逾數月卒  
能保全要地實屬異常奮勉。李南華前經唐訓方保  
奏降旨以副將補用著再加恩交軍機處記名。遇有  
總兵缺出請旨簡放。署蒙城縣知縣賀緒蕃著免補  
知縣以同知直隸州知州補用並賞加四品銜以示  
優獎。○又

諭李鴻章奏督軍攻勦蘇州城垣賊勢窮蹙內應官軍

入城截殺。克復省城。一摺。覽奏。實深欣慰。協辦大學士兩江總督曾國藩。遣將助兵。克復名城。著交部從優議敘。李鴻章自簡任江蘇巡撫以來。悉心調度。謀畫萬全。疊下堅城。戰功屢著。此次督軍克復蘇州省城。尤堪嘉尚。著加恩賞加太子少保銜。並賞穿黃馬褂。以示優獎。黃翼升。李朝斌。均著賞給雲騎尉世職。並交部從優議敘。程學啟。著賞給雲騎尉世職。並賞穿黃馬褂。權授江蘇省總兵戈登。帶隊助勦。洞悉機謀。尤為出力。著賞給頭等功牌。並賞銀一萬兩。以示

嘉獎。○三年



諭左宗棠奏攻克杭州餘杭兩城一摺。閩浙總督左宗棠。自督辦浙省軍務以來。連克各府州縣城池。茲復將杭州省城餘杭縣城攻拔。實屬調度有方。著加恩賞加太子少保銜。並賞穿黃馬褂。浙江布政使蔣益澧。自調任浙江以來。戰功卓著。屢拔堅城。茲復親督各軍。克復杭州省城。實屬奮勇異常。著賞穿黃馬褂。以示優獎。○又

諭李鴻章奏官軍攻克常州府城。生擒首逆。全股撲滅一摺。此次李鴻章親督各軍。痛殲巨股。克拔堅城。實屬謀勇兼全。深堪嘉尚。著加恩賞給騎都尉世職。道

員李鶴章。遇缺提奏提督劉銘傳。記名提督郭松林。王永勝。儘先提奏提督劉士奇。俱能親冒矢石。奮勇爭先。均著賞穿黃馬褂。以旌勞勩。遇缺提奏提督黃翼升。著交部從優議敘。權授江蘇省總兵戈登。帶隊助勦。疊著戰功。此次協同攻克常州。尤為出力。著賞加提督銜。並著照李鴻章所請。頒給旗幟功牌。以示優異。○又

諭。官文曾國藩紅旗奏捷。克復江甯省城。逆首自焚。賊黨悉數殄滅。一摺。覽奏之餘。實與天下臣民同深嘉悅。曾國藩著加恩賞加太子太保銜。錫封一等侯爵。

世襲罔替。並賞戴雙眼花翎。浙江巡撫曾國荃著賞加太子少保銜。錫封一等伯爵。並賞戴雙眼花翎。記名提督李臣典著加恩錫封一等子爵。並賞穿黃馬褂。賞戴雙眼花翎。蕭孚泗著加恩錫封一等男爵。並賞戴雙眼花翎。記名總兵朱洪章。武明良。熊登武。伍維壽。均著交軍機處記名。無論提督總兵缺出。儘先提奏。並賞穿黃馬褂。賞給騎都尉世職。記名按察使劉連捷著交軍機處記名。遇有布政使缺出。請旨簡放。並賞加頭品頂戴。賞給騎都尉世職。提督張詩日著以提督遇缺提奏。並加恩賞給一等輕車都尉世

職記名道彭毓橘著交軍機處記名。遇有布政使缺出。請旨簡放。並賞給一等輕車都尉世職。提督朱南桂。蕭慶行。李祥和。蕭開印。羅逢元。均著賞穿黃馬褂。賞給雲騎尉世職。記名提督張光明。曾良佐。均著加恩賞穿黃馬褂。江南提督黃翼升。著賞給一等輕車都尉世職。又

諭軍興以來。各路統帥疆臣。公忠體國。共濟時艱。督飭官軍。埽穴擒渠。將各路逆氛。次第埽蕩。江甯賊勢日孤。卒就殄滅。允宜特加異數。以昭恩渥。欽差大臣科爾沁博多勒噶台親王。僧格林沁。已疊次加恩晉封。

親王世襲罔替。著再施恩加賞一貝勒。令其子伯彥諾謨祜受封。欽差大臣大學士湖廣總督官文。著加恩錫封一等伯爵。世襲罔替。並加恩將其本支毋庸仍隸內務府旗籍。著擡入正白旗滿洲。賞戴雙眼花翎。江蘇巡撫李鴻章。著加恩錫封一等伯爵。並賞戴雙眼花翎。陝西提督楊岳斌。著加恩賞給一等輕車都尉世職。並賞加太子少保銜。兵部侍郎彭玉麟。著加恩賞給一等輕車都尉世職。並賞加太子少保銜。四川總督駱秉章。著加恩賞給一等輕車都尉世職。並賞戴雙眼花翎。署浙江提督鮑超。著加恩賞給一

等輕車都尉世職。西安將軍都興阿。江甯將軍富明阿。均著加恩賞給騎都尉世職。廣西提督馮子材著加恩賞給騎都尉世職。署京口副都統魁玉著加恩賞給雲騎尉世職。漕運總督吳棠著賞給頭品頂戴。仍交部從優議敘。○又

諭。恭親王自簡授議政王以來。於今三載。適值東南等省。兵事方殷。一切深資贊畫。忠勤丕著。軍機大臣文祥等。前於蘇杭省城克復。各案内。屢欲降旨加恩。均經再三懇辭。茲當江甯省城克復。本欲援照從前優獎成案。降旨施恩。乃仍復懇切力辭。不得已酌中給

予恩施。以獎勞勩。議政恭親王著加恩賞加軍功三級。仍加賞一貝勒。令伊子奉恩輔國公載澂受封。並封伊子載濬入八分輔國公。載灃不入八分鎮國公。軍機大臣工部尚書文祥著賞加太子太保銜。伊姪凱肇並賞給員外郎分部學習行走。戶部尚書寶鋆著賞加太子少保銜。並賞戴花翎。工部尚書李棠階著賞加太子少保銜。伊子李滄著賞給舉人。准其一體會試。兵部左侍郎曹毓瑛著賞加頭品頂戴。賞戴花翎。以示朕慶賞酬庸之意。○又以克復湖州府城

賞道員潘鼎新穿黃馬褂。翰林院侍講劉秉璋

巴圖魯名號。道員張樹聲。二品頂戴。以按察使  
遇缺提奏。予署福建陸路提督郭松林優敘。  
又以官軍追勦敗匪。生擒幼逆洪幅瑱。

諭。沈葆楨自簡任江西巡撫。籌防籌勦。深合機宜。並生  
擒首逆。殲除各巨酋。實屬勤勞懋著。加恩著賞給一  
等輕車都尉世職。並頭品頂戴。署浙江提督鮑超。此  
次督軍入江。疊摧巨股。連克堅城。遂能盡埽逆氛。膚  
公立奏。加恩著錫封一等子爵。又

諭。閩浙總督兼署浙江巡撫左宗棠。督師入浙。恢復浙  
東各郡縣。進攻浙西。攻克杭州省城及湖州等府縣。



肅清全浙。茲當幼逆洪福瑱就擒。東南軍務漸次底定。自應渥加懋賞。左宗棠著加恩錫封一等伯爵。浙江布政使蔣益澧。廓清浙境。懋著戰功。並著加恩賞給騎都尉世職。○六年

諭。李鴻章馳奏。派軍南追。生擒賴汶洸。餘逆剿滅淨盡。慶幸良深。從此江南安徽山東湖北等省。生民得以安業。自宜特沛恩施。以酬勞勩。湖廣總督一等肅毅伯李鴻章。加恩著賞加一騎都尉世職。直隸提督劉銘傳。加恩著賞給三等輕車都尉世職。福建提督郭松林。湖南提督楊鼎勳。副都統善慶。加恩均著賞給

騎都尉世職。山東布政使潘鼎新著賞給頭品頂戴。

○又

諭。捻逆擾亂江南安徽山東湖北河南等省各疆臣公忠體國共濟時艱。允宜特加異數。用普恩施。大學士兩江總督一等毅勇侯曾國藩。加恩著賞加一雲騎尉世職。安徽巡撫英翰。加恩著賞給三等輕車都尉世職。漕運總督張之萬。著賞加頭品頂戴。並賞戴花翎。河南巡撫李鶴年。浙江巡撫李瀚章。均著賞加頭品頂戴。三品頂戴前任直隸總督劉長佑。著賞加二品頂戴。○七年

諭李鴻章奏查明逆首張總愚實在下落各軍擒捕餘  
匪淨盡直隸山東一律肅清一摺李鴻章自督兵赴  
勦以來各該將領隨同進勦均能奮勉出力自應渥  
沛恩施以示鼓勵所有尤為出力之提督劉銘傳著  
由三等輕車都尉晉為一等男郭松林著由騎都尉  
晉為一等輕車都尉宋慶著賞給二等輕車都尉世  
職張曜著賞穿黃馬褂並賞給騎都尉世職副都統  
善慶著賞給二等輕車都尉世職溫德勒克西著賞  
穿黃馬褂並賞給騎都尉世職山東布政使潘鼎新  
著賞給雲騎尉世職一等輕車都尉提督黃翼升著

賞加一雲騎尉世職。總兵周盛波等十一員。均著照一等軍功從優議敘。候補鴻臚寺少卿袁保恆著開復前次降調處分。仍以翰林院侍講學士補用。並加恩賞給三品銜。頭等侍衛陳國瑞著賞還黃馬褂花翎勇號。並開復總兵記名提督。仍賞給雲騎尉世職。

○又

諭。李鴻章馳奏勦辦捻匪。全股蕩平。覽奏之餘。實深嘉悅。李鴻章著賞加太子太保銜。並以湖廣總督協辦大學士。左宗棠著賞加太子太保銜。並交部照一等軍功議敘。丁寶楨英翰均著賞加太子少保銜。並交

部照一等軍功議敘。李鶴年著賞戴花翎。並交部照一等軍功議敘。崇厚著賞加太子少保銜。頭品頂戴。並賞戴雙眼花翎。兩江總督曾國藩著交部從優議敘。○九年

諭。蘇鳳文奏官軍由越南凱撤入關一摺。廣西逆匪吳亞終等。由太平竄擾越南。經提督馮子材親統大軍馳往勦辦。當將首要各逆殲除淨盡。越南境內一律肅清。實屬調度有方。馮子材前已賞給騎都尉世職。著加恩再賞一雲騎尉世職。以示優獎。○十年

諭。左宗棠奏平毀金積堡賊巢。首要各逆伏誅。甯靈肅

清一摺。陝甘總督一等伯左宗棠。著加恩開復降三級留任處分。並加賞一騎都尉世職。甯夏將軍穆圖善。著交部從優議敘。道員劉錦棠。著加恩賞給雲騎尉世職。提督雷正綰。著照一等軍功例從優議敘。○

十一年

諭。李瀚章。王文韶。奏援黔各軍。攻破賊巢。苗疆平定。曾璧光。周達武。奏。下游官軍。會剿大股苗匪情形。各一摺。覽奏。實深欣慰。湖廣總督李瀚章。署湖南巡撫布政使王文韶。貴州巡撫曾璧光。貴州提督周達武。均能和衷共濟。克竟全功。著一併交部從優議敘。記名

布政使席寶田。著賞給騎都尉世職。○十二年

諭劉嶽昭曾璧光周達武奏雲貴官軍會克新城老巢黔省上游肅清一摺。現在全省底定。自應渥予恩施。曾璧光著賞給頭品頂戴太子少保銜。雲騎尉世職。周達武著賞給騎都尉世職。○又

諭劉嶽昭岑毓英奏克復大理府城首逆伏誅。全郡肅清一摺。雲南巡撫岑毓英。謀勇兼裕。調度有方。著賞穿黃馬褂。並賞給騎都尉世職。雲貴總督劉嶽昭。著開復革職留任處分。交部從優議敘。記名提督開化鎮總兵楊玉科。著賞給騎都尉世職。○又

諭劉嶽昭岑毓英奏官軍攻克騰越廳城並各處賊巢雲南全省肅清一摺雲南巡撫岑毓英著賞加太子少保銜該撫前經賞給騎都尉世職著加恩改為一等輕車都尉世職雲貴總督劉嶽昭著賞穿黃馬褂雲南開化鎮總兵楊玉科前經賞給騎都尉世職著加恩改為一等輕車都尉世職總兵李維述提督段瑞梅蔣宗漢徐聯魁均著賞給雲騎尉世職○又諭陝甘逆回擾亂十有餘載自簡任左宗棠總督陝甘以來不辭艱苦次第勦除此次親臨前敵督飭將士克復堅城關內一律肅清朕心實深嘉悅左宗棠著



以陝甘總督協辦大學士。該大臣前經賞給騎都尉世職。並著改為一等輕車都尉世職。○又

諭。前據左宗棠奏肅州克復。關內一律肅清。先後降旨。將左宗棠等及在事出力各員。優加獎勵。因思該省各路統兵大員。同心協力。共奏膚公。允宜一體施恩。以彰勞勩。將軍金順。已加恩開復革職處分。著再賞還黃馬褂花翎。清字勇號。穆圖善。著賞給雲騎尉世職。提督宋慶。張曜。均著賞戴雙眼花翎。副都統銜西甯辦事大臣豫師。著賞給頭品頂戴。其辦理西征糧臺之二品頂戴詹事府詹事袁保恆。亦著賞給頭品

頂戴。○光緒四年

諭左宗棠金順劉典紅旗奏捷克復南路西四城回疆一律肅清一摺欽差大臣大學士陝甘總督左宗棠著加恩由一等伯晉為二等侯候補三品京堂劉錦棠著由騎都尉世職晉為二等男遇有三品京堂缺出開列在前提督余虎恩譚拔萃前經賞給騎都尉世職均著改為一等輕車都尉世職道員羅長祜著賞給雲騎尉世職並賞穿黃馬褂提督黃萬鵬前經賞給雲騎尉世職著改為騎都尉世職董福祥陳建厚均著賞給雲騎尉世職蕭

元亨。戴宏勝。前經賞給雲騎尉世職。均著改為騎都尉世職。騎都尉世職。提督席大成。著賞加一雲騎尉世職。陶生林。前經賞給雲騎尉世職。著改為騎都尉世職。譚慎典。張春發。湯仁和。李龍寶。潘長清。均著賞給雲騎尉世職。桂錫楨。著賞穿黃馬褂。並賞給三代正一品封典。提督張俊。總兵侯名貴。提督湯彥和。總兵夏辛酉。均著賞穿黃馬褂。提督章洪勝。著賞給頭品頂戴。方友升。著賞給頭品頂戴。並三代正一品封典。歐陽勝等。均著交部從優議敘。○十年。以提督劉永福所部員弁。與敵人接

仗者有勞績。予都司銜黃守忠遊擊。都司銜盧玉珍守備銜吳鳳典都司千總劉安南守備均賞戴花翎。○十一年

諭岑毓英奏宣光臨洮獲勝出力人員。分案請獎。一摺。岑毓英調度有方。懋著勞勩。著加賞一雲騎尉世職。並交部從優議敘。總兵何秀林。著交部照一等軍功從優議敘。提督劉永福。著賞給依博德恩巴圖魯名號。並賞給三代一品封典。前雲南藩司剛毅。著交部從優議敘。主事唐景崧。著賞戴花翎。並交軍機處存記。候旨簡用。道員湯聘珍。岑毓英。

均著交軍機處存記。遇有道員缺出，請旨簡放。

又

諭蘇元春李秉衡奏官軍疊次克城破壘一摺。蘇元春著加恩由騎都尉世職改為三等輕車都尉世職。並再賞給額爾德蒙額巴圖魯名號。馮子材著賞加太子少保銜。並由騎都尉世職改為三等輕車都尉世職。南關一役總兵王孝祺已革布政使王德榜戰功卓著。王孝祺著賞給雲騎尉世職。並交部從優議敘。王德榜著開復原官原銜翎枝勇號。並賞給白玉搬指一箇。白玉翎管一枝。大荷包

一對。小荷包二箇。總兵陳嘉提督蔣宗漢方友升。張春發均能奮不顧身。踴躍用命。陳嘉著賞給頭品頂戴。雲騎尉世職。並賞給白玉搬指一箇。白玉翎管一枝。大荷包一對。小荷包二箇。蔣宗漢著賞給頭品頂戴。並賞給白玉搬指一箇。白玉翎管一枝。大荷包一對。小荷包二箇。方友升著賞給雲騎尉世職。並賞給白玉搬指一箇。白玉翎管一枝。大荷包一對。小荷包二箇。張春發著賞給三代正一品封典。並交部從優議敘。兩廣總督張之洞撥軍籌餉。用奏膚公。護理廣西巡撫按察使李秉衡轉

運後路糧械俾無缺乏。允宜一體加恩。張之洞著  
賞戴花翎。李秉衡著交部從優議敘。

欽定大清會典事例卷六百四

兵部

八旗處分例 考察 軍政卓異 軍政糾劾

考察○康熙十一年議准。鑾儀衛滿官不考察。  
○又議准。犧牲所官不入軍政。○雍正元年議  
准。領侍衛內大臣。八旗都統前鋒統領護軍統  
領步軍統領副都統皆係近

御大臣。不必具疏自陳。至所屬武職各官。令其確覈  
賢否。註考舉劾。將行止端方。居官勤慎。弓馬嫻  
熟。馭兵有律。給餉無虛者。列名薦舉。貪酷不謹。



罷輒年老者有疾才力不及浮躁者分別糾劾其  
步軍尉暨守

壇

廟官散秩世爵有疾不能行走者題叅年老者免其糾  
劾至各省駐防官五年考察一次將軍都統副  
都統自行陳奏其所屬官令將軍等秉公考察  
○又議准御史部院司官兼任武職者不在軍  
政之例內外考察旗員有在軍前受傷得功者  
均詳註於冊其不入舉劾照常留任者均令該  
管官註考造冊送部至考察在京旗員由部疏

列管理旗務王公滿洲蒙古都統副都統前鋒  
統領護軍統領滿洲授漢軍都統副都統本部  
滿尚書侍郎奏請

簡命。公同考察。河南太原二處城守尉各官。同前列  
名。奏請

遣往考察。內外考送軍政冊。於本年十月具題。下部。  
部會都察院兵科。河南道。今京道。察覈具奏。黜陟  
如法。○二年議准。

圓明園八旗武職。火器營健銳營官員。遇軍政之  
年。令該管王大臣一例考察。○四年題准。鄭家

莊昌平州保定府固安縣寶坻縣東安縣良鄉  
縣霸州采育里駐防各官。遇軍政之年。令巡察  
駐防之護軍統領副都統。同該管官考察具奏。  
○乾隆二年議准。內務府所屬兼文職佐領各  
官。仍入京察外。其三旗護軍統領護軍參領護  
軍校驍騎參領佐領驍騎校散職官。不兼文職  
者。照八旗軍政例考察。○七年奏准。綠旗軍政  
均詳開履歷。分別去留。旗員軍政。向無定式。嗣  
後考察。定以四格。一曰操守。或廉或平或貪。一  
曰才能。或長或平或短。一曰騎射。或優或平或

劣。一曰年歲。或壯。或中。或老。並將各官履歷。及有無出征效力受傷得功。註明於冊。送部覈覆。○又議准。步軍校前鋒校護軍校驍騎校。遇軍政之年。令參領協領註考。申報該管大員。察覈明確。彙冊送部。內外旗員調任一年以上者。於新任填註考語。不及一年者。仍於舊任填註考語。○又議准。八旗都統前鋒統領護軍統領步軍統領副都統。舉行軍政之年。咸令具疏自陳。其部院文職兼都統等任者。不在此例。軍政自陳。於九月初一日至初十日。送通政使司陳奏。

有出差者。俟差竣補行。交部察議者。照軍政考察例。會同都察院兵科河南道。今道察覈具題。

○十二年

諭。凡兼有職任之王公。遇大計軍政之年。皆與大臣等一體自陳。舉賢自代。但王公等皆朕宗室。特旨令其兼辦。非按資格錄用之大臣可比。且宗人府王公等。並不自陳。嗣後遇大計軍政之年。兼有職任之王公等。悉停其自陳。○十五年

諭。大計軍政。固三載考績之義。以示激揚。但文武大臣。具疏自陳。雖屬遵循成例。而於實政。未有裨益。蓋中

外大臣。皆朕所簡用。既經委任。其居心之誠否。才具之長短。舉在洞鑒之中。如其不能稱職。早已隨時甄別。其待至三年而計去者。實職非要任。而人非大過。介在可否之間者。至於大臣恪共職守。正宜久任。以收實效。而屆期輒求斥退。復降旨令照舊供職。拘成例而事繁文。非崇實務本之道也。至近御大臣領侍衛內大臣等。或簡自勳戚。或拔從宿衛。其辦理閣務。卿長。以及八旗職任。皆量材器使。非循資錄用者比。且多世沐國恩。趨承左右。論其情理。亦不當引退就閒。甘心暇逸。而每至三年。亦循例求罷。是轉以疏遠。

自居。如君臣一體之義何。前因宗室王公兼有職任者。皆係宗潢近派。特旨令不必自陳。嗣後近御大臣領侍衛內大臣御前侍衛乾清門侍衛等。兼理閣務及八旗事務者。遇大計軍政。皆令不必自陳。餘仍照舊例行。○十七年題准。

靜宜園八旗官照

圓明園各官軍政之例。一例考察。○十八年

諭。上年朕雖經降旨。將考察軍政武職大臣自陳請罷之例停止。但該部仍應具奏請旨。著交兵部遇軍政之年。八旗都統內兼管之諸王尚書外。其餘都統前

鋒統領護軍統領副都統等職名事實。著繕摺具奏  
請旨。又

諭。八旗世爵。與職任官一體軍政。填註操守。才能均屬  
虛名。究非實事。伊等止應論其弓馬人材。平素行走  
何如耳。嗣後八旗世爵。不必入軍政考察。交該旗大  
臣三年一次引見。於引見時。仍將平日行走如何之  
處。一併聲明具奏。永著為令。○又奏准。領侍衛內大  
臣。

御前大臣侍衛。

乾清門侍衛。兼領旗務者。向不自陳。均毋庸開列



事實。其駐防將軍都統副都統亦照八旗開列  
事實之例請

旨。嗣後軍政之年。八旗都統等。於九月初一日至初  
十日。造具事實清冊送部。駐防將軍等。於十月  
內造具事實清冊送部。由部彙疏以

聞。○二十六年奉

旨。清語為旗人舊制。理應視為最要。首先勤學。從前各  
部院官員回堂。俱用清語。該堂官如果留心。將所屬  
官員試看。清語好者。再加策勵。更進優嫻。其清語生  
疏者。即行教誡練習。毋失舊制。嗣後務須留心遵行。

外。明年京察官員時。必將清語好。又兼辦事好者。列為一等。如不能清語之員。雖辦事好。未便濫竽。伊等若不如。此保舉。於引見時。經朕試問。仍有不能清語之人。惟該堂官是問。○二十九年。奏准八旗世職。遇考察之年。該管大臣詳加考驗。將騎射清語優嫻者。列為頭等。帶領引

見。准其紀錄二次。騎射中平者。仍留世職。當差。如騎射清語生疏。年歲尚壯。堪以教訓者。罰俸一年。令該管大臣訓教。俟下次考驗時。其弓馬清語。仍復不堪。即行叅革。世職另行承襲。○三十五

年議准。宗室承襲章京。入於軍政。照八旗世襲官員例。將伊等職名考語。由宗人府造冊咨送軍政大臣考驗。○三十七年

諭。軍政考驗世職官內。有患瘡疾。不必交該旗大臣查辦。若過半年不愈。即行革退。俟痊愈時。仍交軍政王大臣等補行考驗。擬定等次具奏。嗣後俱照此辦理。著為令。○四十一年

諭。考試幼職幼官步箭時。必令各多射數枝。始能分別優劣。以定等次。從前遇考試伊等之年。出派王大臣考試步箭時。每人不過令其射一二枝。即行選取。此

特係王大臣等。速欲看完了事。嗣後考試世職官員。所派之王大臣等。務令每人各射三枝。留心視看。再行選取等次。其軍政各處。特行出派王大臣等考驗。步箭時。俱著照此一體遵行。著為令。○四十二年議准。步軍營左右翼尉。係三品實缺。與內務府護軍統領。城守尉。營總等官無異。將該翼尉一體入於軍政考察。○五十八年

諭。嗣後各省軍政。佐領以下等官。毋庸送部引見。○嘉慶四年

諭。大門上行走侍衛。並無軍政之例。此內保無年。老材

庸者。著入於軍政例內。列於該旗武職之前。考驗。僕侍衛內有差使。嬾惰不安本分者。該管大臣平日查出。即行叅奏。從前應行軍政官員。均係分左右翼二處看驗。徒延時日。嗣後將左右兩翼應行考驗官員。分作四處考驗。著為例。○又奉

旨。黏杆處侍衛鑾儀衛章京等。著入於軍政。○五年奉旨。王公等門上五品以上護衛等。遇軍政之年。著交派出之。王大臣等。列於大門侍衛鑾儀衛章京之後。閱看。其護軍校典儀。著不必入於軍政。○六年議准。宗室親王郡王貝勒貝子公門上一二三等護衛。

遇軍政之年。由各王公門上將護衛職名造冊咨報宗人府。彙齊送部。列於大門上侍衛鑾儀衛章京人員之後。交

欽派考驗軍政之王大臣閱看騎射。毋庸薦舉卓異。其中若有弓馬生疏者。令該王公等勒限演習。以期熟練。○又奏准八旗世職遇考察之年。該管大臣詳加考驗。如騎射清語生疏。將不能訓教之該管大臣罰俸一年。○七年奏准內務府三旗護軍統領遇軍政之年。毋庸王大臣驗看。即由內務府將事實履歷造冊咨送兵部辦理。

○又

諭。茶膳房章京侍衛。每日豫備茶膳。是其專責。與操演營伍侍衛官員門上侍衛有間。且伊等實無操演之暇。茶膳房章京侍衛著施恩。仍不必入於軍政。○道光二年奏定。八旗前鋒護軍上三旗包衣護軍火器營護軍健銳營外火器營。

圓明園兵丁等馬步箭。兵部三年一次。於二月內奏請。

欽點大臣驗看。如有騎射生疏者。據實叅奏。交部將該管大臣降一級留任。該管官員降二級留任。

○三年

諭。兵部議覆孫玉庭等奏江蘇等省世職人員。各就本省考驗甄別一摺。江蘇安徽兩省雲騎尉恩騎尉世職人員。於未經得缺之前。每屆三年甄別。仍照例隸督標者歸總督考驗。隸撫標者歸巡撫考驗。其安徽省隸各鎮協標之隨營世職。相距總督駐紮處所。本屬隔省。往返較遠。該省巡撫兼提督銜。嗣後該世職等三年甄別。著照雲貴等省之例。准其改歸安徽巡撫就近考驗弓馬。據實甄別報部。仍令該撫移咨總督查覈。至江蘇省提督駐紮松江。凡附近提督鎮協



營分。著即就近由提督考驗甄別。移咨總督察覈報部。其附近總督鎮協各營。如隸提標之江甯城守協。並京口協。鎮江揚州等營。均距總督衙門甚近。若令前赴松江考驗。再送總督衙門甄別。往返千餘里。殊滋勞費。著即徑送總督考驗甄別。知照提督備案。不必因隸提標。再由提督考轉。其雲騎尉補缺。仍照例由總督考選。恩騎尉例拔千總。仍視營分遠近。分別各歸督撫就近考拔。以昭覈實。○七年奏准。軍政年  
至六十五歲以上。應行引

見人員內。如有患病告假者。除患病至六箇月限滿

尚未痊愈。即行開缺外。其限內病痊假滿各員。仍由各該旗營大臣先行考驗。將應入計典各員。造冊咨部辦理。有堪以留任者。填註考語。造具補考冊籍送部。兵部即併入應行引

見堂考官員內一體考驗。隨時帶領引

見。至六十五歲以下。及應送王大臣考驗留任。毋庸引

見人員。如有考驗時咨報患病。告假屬實者。亦於病痊假滿後。由該管旗營大臣補行考驗。分別去留。填註切實考語。造冊送部。由部隨案具題。

十二年

諭。富僧德奏黑龍江官員軍政留任一摺。此次黑龍江軍政官員內。現任職官副都統銜總管特松阿等五十五員。世襲職官騎都尉百歲等十一員。年已逾歲。精力未衰。尚能騎射。著照所請。俱准其留任。惟摺內應行聲明該員等年歲俱係六旬有餘。乃富僧德僅將各該員履歷造冊咨送兵部。並未將銜名年歲。於摺內聲明。殊屬含混。嗣後著各省將軍副都統等。凡遇軍政官員逾歲留任。銜名年歲。另繕名單具奏。毋稍含混。○又

諭。前據那彥寶等奏。考驗成都軍政官員。防禦濟忠阿年屆六十五歲。精力未衰。懇請留任。已照所請准行。惟思成都駐防官員衆多。恐尚有逾歲人員。當交兵部查覈。茲據查出成都咨送冊內。有世襲雲騎尉郭爾敏布一員。現年七十七歲。開註應留字樣。此次各省將軍副都統等考驗軍政。所有逾歲世襲官員留任之處。均經陸續奏到。乃那彥寶等僅將郭爾敏布留任報部。辦理竟未盡一。殊屬非是。那彥寶海明著傳旨嚴行申飭。嗣後各省將軍副都統每屆軍政之期。如有年逾六十五歲之世襲官員。著秉公考驗具

奏。毋許含混報部。○又議准軍政考驗。各設立六力官弓。凡前鋒護軍健銳火器等營官員。年在五十以內者。均令先開挽官弓。果能裕如。方准較射。仍以中靶為合式。至八旗各營。如有力強請開挽官弓者。登註該員名下。中靶即列為上選。其力弱不能挽強者。仍准照舊以中靶為合式。其應行留任人員。如馬步俱屬可觀。記有雙圈者。兵部題請給予紀錄一次。其馬步俱屬平記。有雙直者。該旗營大臣勒限訓練。先將本員罰俸六箇月。○十七年

諭。嗣後著傳諭各省將軍副都統及新疆各大臣等。遇軍政之年。務將逾歲而精力未衰。應行留任各員年歲。明白繕單。隨時呈遞。毋許含混。○又

諭。各省駐防旗員。遇軍政之期。前曾降旨飭令該管大臣覈其年歲精力。認真舉劾。昨復降旨申諭。乃近來各省於開列年歲。及分別奏咨。辦理總未畫一。嗣後該將軍等於軍政屆期。務當遵照前降諭旨。認真察看。除照例舉劾外。其年齒雖老。精力未衰者。自協領至驍騎校。均著該管大臣詳晰查驗。該員等年歲若干。逐一開列。專摺具奏。以昭覈實。而符定制。○二十

二年

諭。各省駐防考驗逾歲人員。於具題時。俱將該員等旗分職名年歲。另繕清字夾片具奏。○同治元年

諭。前因御史陳廷經奏請變通營制以一事權。降旨令兵部議奏。茲據奏稱總督駐紮地方。與巡撫相隔較遠。自應量為變通等語。嗣後除專設總督之直隸江南四川甘肅暨督撫同城之福建廣東湖北雲南仍遵舊制。會同提督辦理外。其江蘇浙江安徽江西陝西湖南廣西貴州等省。各鎮協武職升遷調補。著就近暫由巡撫辦理。千總以下。徑由巡撫咨拔報部。守

備以上。有提督省分。仍俟各鎮移咨提督查覈後。由巡撫會同總督分別題奏。其總督兼轄省分。軍政考覈著徑由巡撫就近註考。確定去留。會同總督提督具題報部覈辦。

軍政卓異。○乾隆七年議准。外省駐防官。有引見未滿三年。而該上司舉為卓異者。由部請

旨定議具奏。不必引

見。以卓異加一級註冊。○又議准。駐防各城軍政卓異官。如山海關等處協領。各城城守尉。遇有外省副都統員缺。由部開列題補。張家口總管各



城防守尉佐領。由該旗以城守尉京城參領題補。各城防禦。由該旗以本處防守尉圍場總管及京城步軍副尉題補。各城驍騎校。由該旗以本處防禦及京城步軍尉題補。巡察圍場官。由該旗以圍場總管及京城步軍尉題補。各城領催。令該管之城守尉防守尉等。選弓馬嫻熟。效力年久者。保舉咨部。以本處驍騎校京城驍騎校及六品官題補。以上各官及領催內。有願居在外者。呈明考察大臣。仍留本處。○十八年奏准。駐防官軍政之年。大典攸關。各省薦舉。理應

慎重。應按地之大小。官之多寡。酌中定額。黑龍江七人。

盛京六人。吉林五人。西安。綏遠。城右衛各四人。江甯。杭州。荊州各三人。京口。甯夏。涼州。莊浪。成都。廣州各二人。熱河。山海關。青州。福州各一人。至河南。太原。遇軍政之年。向係

特簡大臣考察。獨石口。千家店。張家口。古北口。鄭家莊。昌平州六處。保定府。固安縣。寶坻縣。東安縣。雄縣。良鄉縣。霸州。米育里八處。向有巡察大臣統轄。以上駐防各處。官數無多。毋庸定額。嗣後

軍政。令各該管官秉公考察。果有賢能出衆。准其薦舉一人。若無堪膺薦舉者。任闕無濫。其各省將軍等。或因定有薦額。徇私濫舉。經部查出。據實叅處。二十一年

諭。駐防城守尉之設。表率將弁。整飭營伍。是其專責。近京地方。如保定等處。城守尉有護軍統領管轄。不時督察巡閱。惟河南太原兩處。並無大員節制。且與所轄之佐領官階體制。不甚相懸。一切稽察彈壓之處。未免因循贍顧。嗣後著即歸於巡撫節制。所有該官弁技勇及馬匹器械。該撫隨時察覈。分別奏聞。其有

懈弛不職弓馬生疏者。即將該官并據實叅處。○三十二年奏准。江甯京口官員薦舉共三人。○又奏准。綏遠城察哈爾獨石口千家店等處駐防官員。歷次移紮裁汰。薦舉數目。亦應酌定。右衛歸併綏遠城。酌定薦舉官二人。獨石口千家店張家口等三處。並昌平州。令察哈爾都統兼管。遇軍政之年。該都統一體考驗。定額薦舉四人。酌添一人。古北口駐防官。令熱河副都統兼管。遇軍政之年。該副都統一體考驗。定額薦舉一人。酌添一人。各該處如無堪膺薦舉者。任闕無

濫滄州駐防。現經議令稽察保定府等八處大  
臣管轄。遇軍政之年。應入於保定府等八處內  
一體薦舉。○三十三年覆准。伊犁軍政卓異官  
員。毋庸送部引

見題補。如伊等應升得缺時。將卓異之處。聲明具奏。  
索倫察哈爾額魯特官員。原無軍政之條。仍照  
舊辦理。至滿洲錫伯官員。照依伊等原處軍政  
之例辦理。○四十一年奏准。烏魯木齊巴里坤  
古城等三處。俱設立駐防。其應行卓異人員。各  
照所設駐防人數。酌量定額。烏魯木齊二人。巴

里坤古城每處各一人。該三處係邊疆要地。距京遙遠。卓異官員。毋庸送部引

見。俟應升得缺時。將卓異之處。聲明具奏。如無堪膺薦舉者。仍照定例。任闕無濫。○四十二年奏准。涼州薦舉官員。定為一人。○又

諭。向來伊犁官員等。遇軍政之年。保舉卓異後。不令特行送京引見者。原因伊犁為極邊地方。往來拮据。是以停其特送引見。但此等卓異人員。軍政大典攸關。未經引見。而將軍大臣等閱看。即作為卓異。亦不合宜。嗣後伊犁等處官員。遇軍政之年。將指為卓異者。

臨時奏聞註冊。俟伊等應升之缺。保送引見。將卓異之處。一併聲明具奏。俟引見之日。朕允准後。再准其卓異。其協領等內指為卓異者。亦俟伊等年滿送京引見之時。一併聲明具奏。引見之日。朕允准後。再准其卓異。○四十七年議准。烏魯木齊移紮吐魯番。添設官十五人。應即歸併烏魯木齊軍政。原額薦舉二人。增薦一人。共薦舉三人。如無堪膺薦舉之人。仍照定例。任闕無濫。○又題准。密雲新設駐防軍政官員。應照熱河之例。准其薦舉二人。其應入舉劾各事宜。及該副都統事實。均照定

例辦理。○四十八年議准。八旗佐領補放副參領。驍騎校補放印務章京。如係薦舉之人。即將卓異查銷。○四十九年議准。嗣後伊犁舉行軍政額數。薦舉不得過四人。○五十二年奏准。在京八旗驍騎營薦舉額數。滿洲驍騎營。每次不得過四人。蒙古驍騎營。每次不得過二人。漢軍驍騎營。左右翼前鋒營。八旗護軍營。每次不得過三人。

圓明園護軍營。內務府三旗護軍營。每次不得過四人。火器營健銳營步軍營。每次不得過六人。



內務府三旗驍騎營。每次不得過二人。○五十八年奉

旨。各省軍政佐領等官。雖有列為卓異之例。但佐領等官引見後。不過加一級發回本地。况本省遇有應升缺出。仍由此項人員內揀選題補。似此佐領等官。徒拘泥成例。列為卓異。致令遠涉途路。虛糜盤費。且三年舉行一次。所費尤繁。嗣後各省如有協領等官缺出。可將此項人員保舉。庶可省伊等繁費。而於升途亦無滯礙。著為令。○五十九年奏准。八旗滿洲驍騎營。每次薦舉不得過五人。○嘉慶四年奏准。大

門上侍衛黏杆處侍衛鑿儀衛章京等。令該管大臣詳覈註考。均於六十員內。准其薦舉一人。其不足六十員者。如果人材出衆。堪膺薦舉。亦准其薦舉一人。儻不得其人。任闕無濫。若薦舉不實。將該管大臣照例議處。○又奏准。

圓明園護軍營。內務府三旗護軍營。內務府三旗驍騎營。各營薦舉額數。二人至四人不等。約以四十員內。准該管大臣薦舉一人。○五年奏准。各省駐防佐領防禦。改歸舊例。入於軍政考驗。如有賢能出色之員。准其與協領參領等一體。

薦舉。近京密雲等處。及各省駐防。

盛京吉林黑龍江。均令送部引。

見伊犁烏魯木齊巴里坤古城。離京較遠。應令仍照舊例。遇有差使之便。再行赴京引。

見。○六年奏准。駐防卓異。增減額數。黑龍江減為六人。

盛京減為五人。吉林察哈爾減為四人。○十七年奉

旨。考試軍政。係國家之大典。欽派監試之王大臣。理應慎重覈實。此次派出監試軍政之端恩等。監試將綿

丹等二十四人。作為頭等具奏。朕親御箭亭看視。騎都尉齊穆清。弓箭準弓硬。當時將齊穆清。阿賞給三等侍衛。著在乾清門行走。其餘合式者。均賞給大門上侍衛。此內奉恩將軍宗室嘉端。弓箭平常。恩騎尉舒凌阿。雖俱射中。不能奏對履歷。當將嘉端改補二等。舒凌阿改補三等。是此次朕親臨閱視步箭。將平常者始行看出改補。設如在宮。將伊等帶領引見。不過拉弓。其箭合式。平常何能分別。顯係監試王大臣監試時。並未認真覈實。作為三等之舒凌阿。著照例罰俸一年。監試之王大臣。端恩等。交部查議。嗣後官

員軍政考試作頭等者。經朕改補二等。應毋庸議外。如有改補三等者。原派王大臣等交部察議。著為令。

○道光二年

諭。托津等奏會同妥議軍政章程一摺。所議是。嗣後辦理軍政。凡旗營各員。年逾六十以上。不能騎射者。不准保列卓異。此內如有年齒雖老。精力尚健。不但步箭嫻熟。而馬箭亦屬可觀。或曾經出兵。著有勞績。或於旗營事務。實心經理者。著該管上司。出具切實考語保薦。另冊報部。經派出王大臣查驗屬實。准其列入卓異。其年至六十五歲以上者。由該旗另造一冊。

出具能否騎射步射考語。交派出王大臣秉公校閱。分別去留。仍將應去之員。交兵部帶領引見。至侍衛處鑿儀衛及前鋒護軍火器健銳圓明園等營官員。年至六十五歲以上者。著將侍衛冠軍使以下。委前鋒護軍參領以上各官。另為一班。帶領引見。其八旗參領副參領佐領印務章京步軍營翼尉協尉副尉城門領信礮章京步軍校委步軍校等官。亦著另為一班。與逾歲不射馬箭之前鋒校烏槍護軍校護軍校驍騎校另為一冊。由派出王大臣校閱。分別去留。仍將該員等步履年歲。詳加考驗。如未經該旗營歸

入計典叅劾。實係龍鍾衰邁者。該王大臣即據實叅奏。勒令休致。仍歸入計典六法人員內帶領引見。其年齒雖老。精力未至衰頽。另為一疏。奏請留任供職。用示朕循名責實甄覈持平至意。著為令。○又

諭。在京各旗營軍政。前經大學士軍機大臣會同八旗都統妥議章程。覈實考驗。各省駐防軍政。自應畫一辦理。著照兵部所議。嗣後各省駐防旗員。有年逾六十以上。不能騎射者。俱不准保列卓異。其精力尚健。弓馬嫻熟。或曾經出兵。著有勞績。或實心經理營務。仍由該管大臣出具切實考語保薦。另冊聲明。給咨

赴部引見。如有年力衰邁者。即歸入計典內劾叅。若年齒雖老。精力未衰。亦由該管大臣詳加查驗。秉公甄覈。專摺奏請留任。著為令。○八年

諭。昨由兵部將卓異之京口協領全亮。張家口佐領塔克什布。帶領引見。朕視此二人。步射甚屬生疏。所有全亮塔克什布卓異之處。著不准行。協領佐領俱有管束兵丁之責。弓馬騎射自應嫻熟。乃全亮塔克什布步射甚屬生疏。安能訓練兵丁。該將軍大臣將此等之人保為卓異。並不論其騎射。殊屬不合。前任江甯將軍普恭。前任京口副都統穆郎阿。著察哈爾都



統事務副都統福克精阿。俱著交部察議。將此傳諭各省將軍副都統等。嗣後保舉卓異人員。務須秉公擇其著有勞績。辦事妥幹。騎射精熟之員。儘仍將此等之人保為卓異。於引見時。經朕看出。定將該將軍副都統交部議處。決不寬貸。○光緒三年奏准。薦舉卓異人員。日後犯有貪劣實迹者。將原薦舉之該管大臣。照薦舉匪人例。降二級調用。

軍政糾劾。○乾隆二年覆准。在京八旗軍政案內。不謹罷。輟年老。有疾才力不及。浮躁。應降革休致各官。除驍騎校等係六品微秩。毋庸引

見外。餘於議處本內。敘明應否引

見請

旨欽定。○又覆准。內外八旗武職。遇軍政之年。令

欽點王大臣。並該管各上司。秉公考察。有年老而精力未衰。曾經出征。著有軍功。仍留原任。若年力皆衰。雖有軍功。實難任事。照例休致。此等休致之人。曾經陣戰受傷。得有功牌者。覈明請

旨。給以全俸。以養餘年。出征未曾臨陣。及無功牌者。覈明請

旨。賞給半俸。至效力年久。並未出征者。仍照八法例。

勅令休致。年至六十以上。填註有疾者。亦照年老休致給俸之例行。○三年奉

旨。駐防糾劾各官。著問伊等有情願來京者。著該管各大員給咨赴部引見。○七年議准。京口。福州。廣州。將軍所轄旗員。仍照八旗軍政之例行。其所轄綠旗營弁。照直省綠旗營弁軍政例辦理。○又奏准。職任官兼佐領世爵。軍政案內以浮躁糾參者。留其世爵。將職任官與佐領一併降調。以才力不及糾參者。將現任官降調。仍留佐領世爵。若係公中佐領。不在此例。○又議准。軍政休致

各官。曾在軍前效力。本身兼世爵及世管佐領者。應給全俸半俸。俟應襲爵承廕之後。再行請旨。如係兄弟之子承襲。准其分別給俸。其子襲者不  
准給俸。○三十三年覆准。伊犁官員。係邊疆要地。如過年老患病。有十八法者。即行叅奏革職。毋庸俟軍政之年辦理。○嘉慶六年奏准。職任官兼世職。由職任糾叅貪酷不謹罷軟者。將世職一併革退。如由職任官糾叅才力不及並浮躁者。將職任官降調。留其世職。仍每級折罰世職半俸三年。至世襲佐領。雖屬世職。但佐領有

辦事之責。與閒散世職不同。如因軍政議革。議降。均行開缺。另議承襲。○又奏准。世職官於軍政案內糾參。應革職者。革退世職。應降級調用者。亦即開缺。另議承襲。○八年

諭。昨日兵部帶領武職官員引見。內有劾參有疾之原任湖南岳州衛守備周代暄。劾參罷職之原任山西吉州營千總許大詔。均係軍政案內應劾之員。本應照例休致革職。朕以該二員從前在河南湖北軍營。曾經出力。且所參係有疾罷職。尚無別項劣款。特降旨將周代暄以千總補用。許大詔以把總補用。此係

朕軫念微勞。格外施恩。非可援以為例。此後軍政被  
劾之員。不得妄思倣幸也。○十七年奉

旨。據兵部題考試軍政填送闕冗之藍翎侍衛壽喜。照  
例降二級調用一本。朕即諭令慶桂等查明。壽喜係  
吉慶之子。前經革去散秩大臣。賞給藍翎侍衛。壽喜  
平素闕冗之處。慶桂等並未專摺參奏。自請查議等  
語。侍衛等非別項官員可比。領侍衛內大臣。自應隨  
時查覈。如有人本闕冗騎射平常者。當時應即參奏。  
不得俟至軍政。况壽喜係吉慶之子。革去散秩大臣  
賞給藍翎侍衛之人。尤非他員可比。人既闕冗。理應

確查專摺參奏。慶桂等從前並未將壽喜專摺參奏。至軍政時不能隱瞞。始將壽喜填註闕穴。咨送王大臣。壽喜即著革職。慶桂鄂勒哲依圖即照所請交部察議外。嗣後侍衛內有似此人本闕穴騎射平常者。著領侍衛內大臣查出時。即專摺參奏。不得候至軍政。○道光七年

諭。嘉慶十七年奉

旨。侍衛等非別項官員可比。領侍衛內大臣自應隨時查覈。如有人本闕穴騎射平常者。當時應即參奏。不得候至軍政。欽此。蓋因侍衛差務緊要。領侍衛內大

臣等。自應將所屬侍衛時加整飭。毋得待至軍政之年。乃今領侍衛內大臣。止將侍衛內平素貽誤差使等處查出塞責參奏。而遇軍政之年。侍衛內有平庸不及者。並不懲治。殊與

### 皇考

聖旨有違。著交領侍衛內大臣等。嗣後所屬侍衛。務須隨時留心察查。此內如有差使懶惰騎射平常者。一經查出。即行參奏外。至遇軍政之年。務須秉公將侍衛內人勤慎技藝精熟者。列為卓異。其差使懶惰弓馬生疏者。照例懲辦。毋得稍有徇縱。